

ADRODDIAD Y CYNGOR

Bu'r deunaw mis diwethaf yn gyfnod anodd ond diolch mae pethau'n araf ddod i normalrwydd.

Bu i'r Gymdeithas allu cynnal archwiliadau o'r meheryn blwydd mewn gwahanol ganolfannau gylch y wlad. Fel Cyngor 'rydym yn ddiolchgar iawn i bob un ohonoch am lynu at y canllawiau oedd mewn grym a thrwy hynny wneud yn sicr fod pawb yn cadw'n sâff. Felly ar ran y Cyngor, hoffem ddiolch i Arfon a Sian Hughes, yr Archwiliwr Meheryn a'i wraig, am deithio o amgylch y wlad o fewn cyfnod byr iawn i gynnal yr archwiliadau – mae eu gwaith i'r Gymdeithas yn hanfodol bwysig i gadw nodweddion y brid mewn lle a thrwy hynny sicrhau dyfodol disglair i'r brid. Diolch i chwi eich dau!

Fel Cyngor hoffem ddiolch yn fawr iawn i'r rhai ohonoch gefnogodd yr arwerthiannau eleni. Gwelsom arwerthiannau llwyddiannus gyda chyfartaledd pris positif ac hefyd nifer helaeth o'r stoc yn newid dwylo. Mae'r diwydiant defaid wedi gweld marchnad gref eleni a braf yw cael tystio fod y brid Lleyrn yn un sydd wedi elwa o hyn a digon o alw amdanynt.

Mae'r Swyddogion wedi cynnal nifer o gyfarfodydd yn ystod y deuddeg mis diwethaf gyda'r dechnoleg fodern oedd yn ein gallu i wneud hynny a sicrhau fod y Gymdeithas yn ffynnu. Edrychodd y Swyddogion ar nifer o agweddau yn ystod y cyfnod gan gynnwys cofrestru wyn fanw – drwy ddyfalbarhad y staff a'r Swyddogion gwelwyd cynnydd yn y rhai a gofrestrodd eu stoc ac wrth gwrs canlyniad hyn oedd cynnydd yn incwm y Gymdeithas. Cam positif arall gymerwyd oedd cael golwg ar y rhestr aelodaeth a thrwy ddefnyddio y dull o Debyd Uniongyrchol i gasglu'r tâl mae'r broses bellach yn fwy effeithiol.

Gyda BREXIT yn dal i hofran ar y gorwel cymerwyd camau i symud defaid gofrestrwyd yn EU drosodd i adran arall yn y Gofrestr er cydymffurfio â Rheolau Zootech. 'Rydym yn dal i fonitro'r sefyllfa gan ddisgwyl am fwy o eglurdeb ar y rheolau a'r amodau. 'Rydym wedi gweld ychydig o drafferthion i aelodau Gogledd Iwreddon gyda'r newid yn y rheolau symud stoc i ac o'r Deyrnas Unedig. Er nad yw'r sefyllfa wedi ei datrys hyd yn hyn gobeithir gall yr awdurdodau perthnasol ddod o hyd i rhyw fath o ddatrysiad yn fuan.

Cam pwysig arall awgrymwyd gan y Swyddogion i'r Cyngor, a derbyniwyd eu sêl bendith, oedd fod y Gymdeithas am geisio mynd yn Gymdeithas ddi-bapur o fewn yr ychydig flynyddoedd nesaf. Gyda chostau postio, papur a.y. yn uchel

edrychodd y Swyddogion ar y gwahanol fodd i leihau'r costau. Gyda hyn mewn golwg, gofynnir i bob un ohonoch sicrhau eich bod yn gadael i'r swyddfa wybod beth yw eich e-bost cyfredol. Wrth gwrs, os nad oes gennych e-bost ac yn ei chael yn anodd i gael y wybodaeth yma drwy aelod o'r teulu/ffrind, yna gellwch dderbyn copi caled ond gadael y swyddfa wybod.

Mae Rheolau'r Gymdeithas wedi cael eu hadolygu unwaith eto gan y Swyddogion a'r Cyngor, er dod a hwy i fyny a'r gofynion a newid y terminoleg i fod yn ddiuedd o ran rhyw. Bydd y rheolau diwygiedig yma yn cael eu cyflwyno i Gyfarfod Cyffredinol Arbennig o flaen y Cyfarfod Blynnyddol. A wnewch eu darllen os gwelwch yn dda – copi ar wefan y Gymdeithas www.lleynsheep.com neu gellwch gael copi caled o'r swyddfa. Fel Cymdeithas 'rydym yn ddiolchgar iawn i Moss Jones o'r WAOS am ei arweiniad ar y mater.

Gan fod y rhan fwyaf o'r Sioeau wedi eu canslo eleni eto oherwydd y pandemig, cynhaliwyd 'Farm Walkabout (Virtual Farm Tour)' gyda deiliad diadell Wernoog (273) a gellir gweld hyn ar wefan y Gymdeithas www.lleynsheep.com Fel Cymdeithas 'rydym yn ddiolchgar iawn i Stuart a Helen Morris ac Ernie Roberts am adael i ni gael gweld y gweithgareddau o ddydd i ddydd ar y fferm. Diolch i'r bridwyr gyfrannodd at y dyddiadur fideo ar gyfer yr 'Adran Dyddiadur y Bridwyr' – ffordd wych o roi y brid yn ffenestr siop. Cynhaliwyd hefyd nifer o weithgareddau eraill gan gynnwys Sioe Rithiol a 'Primestock Festival' – gellir gweld oll o'r cystadleuwyr a'r enillwyr ar wefan y Gymdeithas.

Nodyn byr i'ch atgoffa ynglyn â'r drefn pleidleisio yn y Cyfarfod Blynnyddol – rhaid eich bod wedi talu eich tâl aelodaeth yn llawn cyn y gellwch benodi dirprwy (yn aelod o'r Gymdeithas a'i peidio) i fynychu'r cyfarfod ar eich rhan ac i siarad a phleidleisio felly. Rhaid i'r penodiad yma gael ei arwyddo gennych chwi a'i gyflwyno i un o swyddogion y Gymdeithas cyn y gall fod yn weithredol. Cofiwch hefyd y bydd yn rhaid i'r person a benodir gennych gyflwyno'r apwyntiad i un o'r Swyddogion **cyn dechrau'r Cyfarfod Blynnyddol**. Nodir hefyd na all unrhyw berson weithredu fel dirprwy dros **fwy nag un aelod**.